

AMÓS

Hawě unãmati hãtxaki

Deusũ hãtxa yuishunika Amósĩ na una kenekinã, 750 ano Jesus Cristo huriamatiã anikiaki. Israelĩ enabũ yushibu dami kēwākĩ henetã hau Deus besti kēwākubainũbũ Deusũ Amós yusĩmaniki. Ha inũ, nuitapaibu hau ana itxakawayamanũbũ Deusũ hatu txitekĩ Amós hãtxamakubainikiaki.

Judá enabuki Deus sinatanikiaki, na hãtxarã

1 ¹ Judá enabũ mai pakea anu hiweabu Uzias shanē ibuhairakĩ hatu yunukubainaitiã inũ, Samaria anua shanē ibuhairakĩ Israelĩ enabu shukuabu anua 9 pashkanibu 2 ano mai patxa sakutxakayamariamakē Joásĩ huni bake Jeroboãonē hatu yunukubainaitiã mae pishta Tecoa anua txashuwã mekenika Amós dayakũkainai na hãtxa Israelĩ enabu 9 shukuabu anu Deusũ hawē hãtxa Amós yuimakubainikiaki.

² Jerusalém anu Mati Sião anushũ
tĩ ikaĩkainai keskawē
hawē hui Senhor Deusũ hatu nĩkamaya
basi txashuwanē pimisbu nukashanai inũ
Mati Carmelo mamakia mai tsusĩ metuhairashanikiki.

Israelbu dapi hiwebaunabu Senhor Deusũ hatu kupishanikiaki, na hãtxarã

³ Eska Senhor Deusũ hatukiri yuai nĩkakãwē:
“Maewã Damasco anu hiweabũ
Gileade anu Israel hiweabu
shekiwã trigo shemeti mane ferrowē
hatu kusha keyukĩ keyunibu inũ,
hawa hatũ txakabu henekatsi ikama ikubainaibuwē taeshũ
ē hatu kupikĩ heneama ishanaii.

⁴⁻⁵ Hatu haska wanibuwē taeshũ

Damasco mishki kenebaunibu
 hikiti shui beputi kushipahairabiakē
 ē hatu puremakī bashnemashanaii.
 Txiwē hatū hiwe menumakī
 shanē ibuhaira Hazaelī enabu yamawamakī
 hawē huni bake Ben-Hadadē hiwe hawērua betsa betsapa ē hatu
 kuamashanaii.
 Bete-Éden anu yununika inū Biqueate-Áven anu shanē ibuai ē hatu
 yamawamariashanaii.
 Hatu haska wamatā
 Síria nawabu hatu atximashū hatu escravo wamatā
 Quir txaihaira anu ē hatu iyumashanaii”,
 iki Senhor Deus hatukiri hãtxakī yuiniki.

6 Hanushū Senhor Deusū ana betsakiri yuikī:
 “Gaza anu hiweabū txakabu betsa betsapa akubaikī
 Israelbū mae betsa hatu atxi keyukī shakawabaikī
 hatū dayaru escravo wabaikī
 Edom nawabū mai pakea anu hatu iyushū
 peiwē taeshū hatu inākī
 hatu ibuwamanibuwē taeshū Gaza anuabu hatu kupikī
 ē hatu heneamari ishanaii.

7 Hatu haska wanibuwē taeshū maewā Gaza mishkiwē
 kenebiabaunibū
 hatū hiwe tibi kuabaūkī
 shanē ibubū hiwe hawērua tibi txiwē
 ē hatu yamawamashanaii.

8 Maewā Asdode anu shanē ibuhaira inū
 maewā Asquelom anu yununika
 ē yamawakī keyushanaii.
 Dasibi ē kushipawē maewā Ecrom ē hatu atxima
 Filisteu nawabu hawa betsa teshe heneama mawai keyushākanikiki”,
 akī Senhor Jeová yuiniki.

9-10 Hanushū Senhor Deusū ana betsakiri yuikī:
 “Maewā Tiro anu hiweabū
 txakabu betsa betsapa akubainibuwē taeshū
 hatu kupikī ē heneama ishanaii.
 ‘Israelbu mā nukunabuki’, aki hatube yubakabianibu
 habias maewā anu hiweabu hatu atxikī keyutā
 dayaru escravo washū
 Edom nawabu hatu inākī ibuwamanibuwē taeshū

maewã Tiro mishkiwẽ kenebiabaunibukẽ
 hatũ hiwe tibi hatu kua keyumakĩ
 shanẽ ibubũ hiwe hawẽrua tibi
 txiwẽ ẽ hatu yamawamashanaii”,
 ikĩ Senhor Deusũ yuiniki.

- 11-12 Hanushũ Senhor Deusũ ana betsakiri yuikĩ:
 “Edom nawabũ mai pakea anu hiwebaunabũ
 txakabu betsa betsapa akubainibuki.
 Haskawẽ taeshũ hatu kupikĩ ẽ heneama ishanaii.
 Israelbu hawenabu kayabibia
 hatuki sinatahairai tsuã hatu nematiruma
 ibubis hatukiri shinaĩ hatuki daetiruma
 hatuwẽ nuiama
 nupe txaiipa kenuhairawẽ detekĩ
 txibãbaĩkĩ hatu itxakawanibuwẽ taeshũ
 hatũ maewã Temã kuakĩ
 hatũ shanẽ ibũ maewã Bozra anu
 shanẽ ibubũ hiwe hawẽrua tibi
 txiwẽ ẽ hatu yamawamashanaii”,
 ikĩ Senhor Deusũ yuiniki.

- 13-14 Hanushũ Senhor Deusũ ana betsakiri yuikĩ:
 “Amom nawabũ txakabu betsa betsapa akubainibuwẽ taeshũ
 hatu kupikĩ ẽ heneama ishanaii.
 Hatũ mai pakea ana ewapa wakatsis ikĩ
 Gileade maewã anu Israelbu hanu hiwebaunabu
 detekĩ aĩbu tuyari nupewẽ txatxikĩ
 hatu puris akubainibuwẽ taeshũ
 nawa betsabu hatu detenamemaya
 ha shabatiã niwe birenepa beaya
 bis bis imakĩ
 ha maewã Rabá mishkiwẽ kenebiabaunibukẽ
 hatũ hiwe tibi kuabaũkĩ
 shanẽ ibubũ hiwe hawẽrua tibi
 txiwẽ ẽ hatu yamawamashanaii.
- 15 Hatũ shanẽ ibu beshmasbube
 hatũ shanẽ ibuhaira atxishũ
 hatũ mai pakea anua txaihaira anu
 hatu iyushãkanikiki,
 ana haria txitũtirubuma wakinã”,
 ikĩ Senhor Deusũ yuiniki.

- 2** ¹⁻² Hanushū Senhor Deusū ana betsakiri yuikī:
 “Moabe nawabū txakabu betsa betsapa akubainibuwē taeshū
 hakimama
 hatu kupikī ē heneama ikūkaīshanaii.
 Edomnē enabu shanē ibuhaira mawa maiwabiainabū
 itxakawakī Moabe nawabū hawē shau betsetā
 kuakī mapu besti wanibuwē taeshū
 Moabe nawabū mai pakea anu
 mae tibi hatu kua keyumakubaūkī
 hatū shanē ibū maewā Queriete anu
 shanē ibubū hiwe hawērua tibi
 txiwē ē hatu yamawamashanaii.
 Nawa betsabube hatu detenamemakī
 trombeta ē hatu txā txā amaya
 detenamei bis bis ikubainaibū
 Moabe nawabu mawashākanikiki.
- 3** Moabe nawa shanē ibuhaira
 hawē shanē ibū beshmasbube hatu atximatā
 eā ē hatu tenāmariashanaii”,
 ikī Senhor Deusū yuiniki.

- 4-5** Hanushū Senhor Deusū hawenabu Judákiri yuikī:
 “Judá enabū mai pakea anu hiweabū
 txakabu betsa betsapa akubainibuwē taeshū
 hakimama hatu kupikī ē heneama ishanaii.
 Ē yunuti hātxa inū ē nemati hātxa
 nīkakī txibākatsi ikabuma
 ea ē Senhor Deusū ē yusīti hātxa danākī
 habias yushibubu dami hatū ibubū kēwāpaunibu
 na habias yushibubu kēwāriakubainaibuwē taeshū
 Judá enabū mai pakea anu
 mae tibi kuabaūkī maewā Jerusalém anu
 shanē ibubū hiwe hawērua betsa betsapa tibi
 txiwē ē hatu yamawamashanaii”, itā,

**Israelī enabu pashkanibu 9 shukuabu nortekiri hiweabu
 Senhor Deusū hatu kupishanikiaki, na hātstarā**

- 6** hanushū Senhor Deusū hawenabu Israelkiriri yuikī:
 “Israelī enabu nortekiri hiweabū
 txakabu betsa betsapa akubainaibuwē taeshū
 hatu kupikī ē heneama iriashanaii,
 habū hatu eska wakubainaibuwē taeshunā.

- Israelbũ hawenabu pe hiwebiabũ peiwẽ taeshũ
 hatu inãkĩ nuitapawamisbuki.
 Ha inũ, betsa nuitapai hiwebiakẽ
 hatuwẽ taeshũ hatũ bitxi tae bimisbuki,
 dayaru escravo hau hatu iyutanũbunã.
- 7 Haska inũ, ẽ yunuti pepa txibãma
 habũ kanekĩ huni betsabu nuitapai keĩsbuma
 babuwakĩ hatu itxakawamisbuki.
 Ẽ kena pepa meribikiri ea hatu yuãmakĩ
 hunĩ hawẽ bakebetã habias aĩbu txutamisbuki.
- 8 Tsuãra matu diria hawẽ tari biãyuimashũ
 ha tari bekãtã haki dakashũ
 yushibubu dami kẽwãti piti mãtxĩtã
 hatubetã mã pimiski.
 Ha dikabi tsuã hawa txakabuwakĩ
 kaneamabiakẽ parãkĩ
 hamẽ itxakawakĩ hawẽ pei pakamatã
 ha peiwẽ uva vinho bishũ
 hatũ mekenika yushĩ kẽwãti hiwe anushũ
 hatubetã ha vinho mã akubaĩmisbuki.
- 9-10 Mã txakabubiakẽ
 eanã, Egito anua matũ shenipabu hatu tashnimabirãkĩ
 hatu bai bepẽshũbirãkinã,
 Amorreu nawabũ mai pakea anu hatu ibuwamanũ, iwanã,
 hanu tsua hiweabuma anu 40 ano
 unãshubira ẽ hatu imatãbauniki.
 Ha Amorreu nawabu huni keyatapabu
 hi kushipa keskabiabũ
 dasibi yamawakĩ ẽ hatu keyushuniki.
- 11 Israelĩ enabuũ, ẽ matu parãma inũ,
 mã ea parãtirumaki.
 Matunabu anua ẽ hãtxa yuishunika
 ẽ hatu katukubaĩmis inũ
 huni meribi Nazireu hawẽ bu mashtetima inũ
 hamapai sharabu buspuai atirubumari katuriakĩ
 ẽ hatu yunukubaĩmiski.
 Haska ẽ hãtxa txanima kayabiwẽ
 ẽ matu mestẽwaniki”, itã
- 12 “Ẽ hatu haska wabianikẽ matubũ hatu itxakawakĩ
 huni meribi Nazireũ vinho akatsi ikabumabiakẽ
 mã hatu amakubaĩmiski.

Ha inũ, ě hãtxa yuishunikabu
 ě kena kushipawẽ hãtxaibu
 hatu nĩkakatsi ikama
 mã hatu nemakubaĩmiski,
 hau ekiri hãtxayamanũbunã.

13 Eã matu kupikĩ ina awã tarãbaĩti shekiwã trigo
 matahairawashũ bumakĩ tarãbaĩkĩ
 mai purekĩ mishpu wamabaĩmis keska wakĩ
 habũ matu txai iyuaibu hanu mã paikainai
 ha mai ě matu pure pure amakubaĩshanaii.

14 Hakia kushitxakayamabiakaĩmis
 haskatã binubaĩ pashatirubuma ishãkanikiki.
 Matũ detenamenika kushipahairabiabu
 hatũ kushipa benui babushãkanikiki.
 Mẽtsisipabiamis haskatã ibubis meketiruma ishãkanikiki.

15 Hawẽ piaki txiti ika kushipabiamis
 haskatã ibubis meketirubuma ishanikiki.
 Kai hawaira nia nia ibiabaĩmisbu inũ,
 cavaloki katsaumbaĩmisbu
 haskatã ibubis pashai meketirubuma iriashãkanikiki.

16 Ha shaba haskaibutianã,
 matũ detenamenika mẽtsisipahairaburi
 pashanũ ika hatũ detenameti mabu dasibi
 pekataũ urẽkĩ sa abaĩshãkanikiki,
 pashatanũ ikarã”,
 haska hãtxa hatu yuikĩ
 Senhor Deusũ hawẽ hãtxa txanima mestẽwanikiaki.

Deusũ hãtxa yuishunikabũ dayarã, eskakiaki, na hãtxarã

3 1 Matũ shenipabu Egito anua Senhor Deusũ hatu tashnimabiranishũ
 mã Israelbu matu yuiairã, nĩkakãwẽ:

2 “Mai hirabi anu nawa shukuabu tibi hiwebiabaunabũ
 habukiri shinãma matu besti katukĩ
 enabu ě matu waniwẽ taeshũ
 txakabu betsa betsapa mã akubaĩmisbuwẽ taeshũ
 ha shinãkĩ ě matu kupishanaii”,
 akĩ matu yuikiki.

3 Habias shinã wãtã yura dabe
 ketashamea maputirubuki, pepa besti akubainirã.

4 Inu betsa leãonẽ ni meranua

- yuinaka betsa atxitã
 benimai hi hi ikai
 txaihairashũ nĩkatirubuki.
 Inu betsa leãonẽ hawẽ bakẽ hawara yuinaka atxitã
 hawẽ kini anu bushũ piaya
 yuinaka betsã dũkebainaya
 haki yaushi tekerẽ tekerẽ imisbuki.
- 5 Huni betsã manaũri hisĩ biruãkĩ pũteawẽ taea
 uiãma isa hui haki irutã yabukui
 mai anu tĩ imisbuki, atxiarã.
 Hamẽ birũ betsa wakĩ
 hanu parãti piti mãtxĩbaunawẽ taea
 yuinaka hushũ ha piti pikĩ
 ha hi dishkia bekumanakĩ
 ha yuinaka dispiwẽ teneshmiski.
- 6 Hamẽ maewã anu mese huaya
 hatu unãmakĩ
 tsuãra trombeta txã txã akaiwẽ taea
 yurabũ nĩkai datemisbuki.
 Ha maewã anu haska kainã,
 Senhor Deusũ ma hanu txakabu hatu yunua
 haska besti kaĩkũkaĩmiski.
- 7 Senhor Deusũ tsumabu hawẽ hãtxa yuishunikabu
 hawẽ shinã bebũkiri habu dukũ banabimariama
 Senhor Deusũ hawa aismaki,
 yura betsabu kupikinã.
- 8 Txaimakea inu leão hui kushipawẽ hi hi ikaya
 tsuã nĩkai datetirubumamẽ?
 Dasibi datetirubuki.
 Hamẽ Deusũ hawẽ tsuma ma yunuawẽ taearã,
 tsuã hãtxashũtirumamẽ?
 Tsuãra nĩkatã shabakabi hatu banabimatiruki.

Maewã Samaria Deusũ kupishanikiaki, na hãtxarã

- 9 Ma Deusũ matu yunuawẽ taearã,
 hawẽ hãtxa hatu yuikubaĩkãwẽ:
 “Maewã Asdode anu shanẽ
 ibubũ hiwe hawẽrua tibi inũ
 Egito nawabũ mai pakea anu
 shanẽ ibubũ hiwe hawẽrua tibi anu bua hatuki txanitãkãwẽ:
 ‘Hatũ txakabuwẽ taea
 ibubis hatunabu nuitapa wakĩ

itxakawamisbu hatu uinũ ika
 Samaria mati matipa anu bekãwẽ,
 aki hatuki txanitãkãwẽ,
 habu hiwe txakaibu inũ
 detenamei betsa betsapaibu
 hau hatu uí benũbunã”, hatu watã

10 Senhor Deusũ hawẽ hãtxa ana yuikĩ mestẽwãkĩ:

“Enabu Samaria anu hiweaburã,
 hawa pepa unãkĩ akabumahairaki.
 Hatu detekĩ hatũ mabu bikĩ yumetsutãshũ
 hatũ shanẽ ibubũ hiwe hawẽrua betsa betsapa tibi anu
 arukubaĩmisbuki.”

11 Haskamisbuwẽ taeshũ Senhor Deusũ hatu yuikĩ:

“Matuki sinataibũ matũ mai pakea kebaũshãkanikiki.
 Matũ maewã Samaria mishki kenebaunibu kushipabiakẽ
 berãkĩ keyutã matũ hiwe hawẽrua betsa betsapa anua
 matũ mabu dasibi mã arukubaĩmis
 biãtã matu keyu buãshãkanikiki”, itã,

12 eska ana Senhor Deusũ yuikĩ:

“Inu betsa leão hushũ txashuwã atxiwãshũ piaya
 txashuwã mekenikã txibãbaĩ pikĩ keyuriama
 hawẽ mestẽtiwẽ kusha kusha akĩ
 leão mepãmakĩ hawẽ tae dabemẽkaĩ,
 hawẽ pabiki debumẽkaĩ,
 hawẽ pabu hawara tesheista mebĩturu keska
 Damasco anua haki bashti iti hawẽrua beabu
 mabuyabu haki bashti imisbu eskarabes
 Israelĩ enabu Samaria anu hiweabube pashashãkanikiki”, itã,

13 Mekenika Deus kushipahaira dasibi binua

Senhor Deusũ hawẽ hãtxa txanima mestẽwãkĩ yuikĩ:

“Matubũ ẽ hãtxa nĩkatã
 Jacó enabu txakabumisbukiri
 shabakabi hatuki txanikubaĩshãkãwẽ.

14 Israelĩ enabũ txakabu betsa betsapa wakubaĩmisbu ha shabatiã ẽ
 hatu unãti waya

Betel anu ha txi tapu hakishũ yushibu betsa kẽwãmisbu
 ha dabe inũ dabe hawẽ matxãkã meshteabu
 mai anu tĩ ikaya

ẽ hatu yunua yamawashãkanikiki.

15 Shanẽ ibubũ hiwe hawẽrua betsa betsapa hatu txakabu wamakĩ
ha elefante hawẽ mashũ makushpi txaipa hushupa nãtakea itxapa
beshũ

hatu inãbu ha makushpi hiwe wakĩ
hawẽrua wanibu txakabu wamakĩ
ha hiwe anu shanẽ ibubu matsitiã hanu hiwemisbu inũ
bariãtiã hanu hiwemisbu dasibi
ẽ hatu yamawamashanai”, akĩ
Senhor Deusũ hawẽ hãtxa txanima mestẽwaniki.

4

¹Mã Samaria anua aĩbuaibu hawẽruabu
mã Basã anu ina awa yushã shuarãwã keskabuũ,
ea nĩkakãwẽ.

Nuitapabiaibu hatu bika tenemakĩ
hawa hayamabiabũ mã hatu itxakawakubaĩmisbuki.
Hanushũ paenũ ishũ
matũ benebũ hau uva vinho matu bishũtanũbũ
mã hatu yunukubaĩmisbuki.

2 Mekenika Senhor Jeová meribi hiweatũ
matukiri yubakĩ yuikĩ:
“Sheamati betãti watã matu hawẽ atxishũ
matũ bakeburi sheamati ewapawẽ betãtã
matu dasibi iyushanaibu ma txaima bea kemakanikiki.

3 Matũ maewã mishki kenebaunibu beshpa anu
matu kekũtã kaĩmabaĩkĩ
iyushũ Mati Hermom anu matu urẽshãkanikiki”,
ikĩ Senhor Deusũ hawẽ hãtxa txanima mestẽwanikiaki.

**Deusũ Israelbu hatu kupibiakubaina hawa
tapĩkatsi isbumakiaki, na hãtxarã**

4 Senhor Deusũ ana hatu yuikĩ:
“Betel inũ Gilgal mae meribi anu hari ana buritãtãkãwẽ.
Matũ shenipabu ẽ yusini hãtxa danãkĩ ea sinatamakĩ
txakabui mã pikuhairakũkainai.
Penama tibi matũ mekenika yushibubu
hawẽ daewati nami sheniya bushũ hatu kuashũkĩ
shaba dabe inũ besti tibi
matũ dízimos hatu inãrikubaĩkãwẽ.

5 Hawẽ benimawati misi shasha watiuma
txi tapu anushũ matũ yushibu dami hatu menushũriakubaĩkãwẽ.
Mae tibi anu tsuabũra hau hatũ inãkuĩti beshunũbũ
hatu banabimarikubaũtãkãwẽ.

Haska mã betxipaikĩ amis besti shinãkĩ arikubaĩkãwẽ,
 ã hãtxa mã nĩkaismarã”, akĩ
 Senhor Jeová hawẽ hãtxa txanima mestẽwanikiaki.

6 Senhor Deusũ ana hatu yuikĩ:
 “Matũ maewã tibi anua ã matu buni tenemaimaki.
 Matũ mae tibi anuari
 matũ piti keyukĩ ã yamawaimaki.
 Hakia ã matu haska wabia
 hawa shinã betsa watã
 ea shinaĩ ea anu mã txĩtuãma ikubainimabuki”, akĩ
 Senhor Deusũ hawẽ hãtxa txanima mestẽwanikiaki.

7 Ana yuikĩ:
 “Ha dikabi shekiwã trigo tsekariabuma
 ushe dabe inũ bestitiã taewakĩ
 ui ã yunuama ikũkainimaki.
 Maewã betsa anu ui imakĩ
 hakia maewã betsa anuri
 ui imakĩ ã yunuama ikimaki.
 Hatũ yunu bai betsa anu ui imakĩ
 hakia yunu bai betsa anu
 ui yunuama ã tsusĩwãkĩ keyuimaki.
 8 Ha yurabu hatũ maewã anu ãpash hayamakẽ
 maewã betsa anua ãpash betxinũ ika
 benai bukubaũkĩ
 ãpash eskarabes betxibiabu
 ha ãpash manukĩ abiabu ãpash itxapamawẽ taea
 hawa ãpash manuabu hatu maĩwãma ikimaki.
 Hakia ã matu haska wabia
 hawa shinã betsa watã
 ea shinaĩ ea anu mã txĩtuãma ikubainimabuki”, akĩ
 Senhor Deusũ hawẽ hãtxa txanima mestẽwanikiaki.

9 Senhor Deusũ ana yuikĩ:
 “Niwe kushipahaira inũ
 isĩ betsa betsapawẽ ã matu datekubainimaki,
 kusha kusha aka keska wakinã.
 Matũ yunu bai inũ
 matũ uva bai utsi wakĩ
 matũ figueira hi inũ matũ oliva hi
 shinĩ hau pikĩ keyunũbũ

ẽ hatu yunuimaki.
 Hakia ẽ matu haska wabia
 hawa shinã betsa watã
 ea shinaĩ ea anu mã txĩtuãma ikubainimabuki”, akĩ
 Senhor Deusũ hawẽ hãtxa txanima mestẽwanikiaki.

- 10 Senhor Deusũ ana yuikĩ:
 “Haska Egito anu atimapa betsa betsapa ẽ hatu yununi keska wakĩ
 isĩ betsa paepa matu anu ẽ yunuimaki.
 Matuki sinataibube detenamei matũ bake berunãbu
 hau mawanũbũ
 ẽ hatu heneimaki,
 hatu merabewamarã.
 Matuki sinataibũ matũ cavalo itxapa matu biãtã
 matu buaĩbu ẽ hawa matu nemashunama ikimaki.
 Detenamei mawashinabu txapui
 pisi maiiai matũ hiwe tibi anushũ
 ẽ matu shetemaimaki.
 Hakia ẽ matu haska wabia
 hawa shinã betsa watã
 ea shinaĩ ea anu mã txĩtuãma ikubainimabuki”, akĩ
 Senhor Deusũ hawẽ hãtxa txanima mestẽwanikiaki.

- 11 Ana yuikĩ:
 “Haska Sodoma inũ Gomorra nawabu
 ẽ hatu kupini keska wakĩ
 matu txakabuhairawakĩ matu yamawabiakĩ
 ẽ matu keyuama ikũkainimaki,
 karu menui keyui tsistekainai anua
 matu neshekĩ akawakinã.
 Hakia ẽ matu haska wabia
 hawa shinã betsa watã
 ea shinaĩ ea anu mã txĩtuãma ikubainimabuki”, akĩ
 Senhor Deusũ hawẽ hãtxa txanima mestẽwanikiaki.

- 12 Ana yuikĩ:
 “Mã Israelĩ enaburã, eanã,
 ẽ maturi kupikatsis ikaii.
 ẽ matu haska washanaiwẽ taea
 ẽ matũ Mekenika Deus matuki sinatakĩ
 ẽ matu kupishanaiwẽ taeshũ
 haska mã teneshanai

bebūkiri shinaĩrakubaĩkãwê”, akĩ
Senhor Deusũ ea yuishina nĩkairakãwê.

- 13 Senhor Deusũ mati matipa wamis inũ,
niwe shũku imamis inũ,
haska yubakani yurabu unãmamis inũ,
shababiakê hatũ betsa wakĩ meshu maewamis inũ,
mai dasibi anu mati keyatapahaira tibi anu nikaũmisrã,
hawê kenarã, Mekenika Deus kushipahaira dasibi binu keyua Senhor
Deuski.

**Deus hatuwê nuaiwê taea hau ana txĩtunũbũ
hatu yuinikiaki, na hãtxarã**

- 5** ¹ Israelĩ enabuĩ, ea Amós ẽ hãtxai ea nĩkakãwê.
Matuwê taea nui matukiri habuai
ẽ kashai ea nĩkakãwê:
² Israelĩ enabu hawêrua hawa txakabuma pepa besti mã ibianibu
mã ibubis atimapai txakabutiani mã txakabuki,
tĩ itã haska ana benitiruma keskairã.
Tsuã matũ txakabuwê taeshũ
matu benitiruma
matũ mai anu tĩ ikima mã maniabuki.
- ³ Mã Israelĩ enaburã,
eska Mekenika Senhor Jeová matu yuikiki:
“Maewã anua ha detenamenikabu 1.000 mã hatu yunuabu
bua detenametani txĩtũbiranirã,
habu hatu deteama ishiãbu
100 besti hiwea beshãkanikiki.
Mae hatiubuma anua 100 detenamenikabu mã hatu yunuabu
detenametani 10 besti hiweria txĩtũshãkanikiki”, itã,
- ⁴⁻⁵ Senhor Deusũ Israelĩ enabu ana yuikĩ:
“Betelrã, txakabuwakĩ yamawakĩ di ashiãbu manishanikiki.
Gilgal anu hiweabu tsuã hatu merabewama
txaihaira hatu iyushãkanikiki.
Haskawê taea Betel anu matũ yushibu kēwaĩ buama inũ
Gilgal anu ana hari buamari inũ,
Berseba anu ana hari mapuyamashãkãwê.
Hakia ea benakĩ ẽ hãtxa nĩkai
eki dasitã haskai ebe hiwekubaĩshãkanikiki”,
akĩ ea yuishinaki.

- 6 Mā hiwekūkaikatsis ikairā,
 Senhor Deus anu txītūtā
 hawē hātxa txibākī
 ea akubaikāwē.
 Hakia mā haska wamakē
 betsatiā txi kushipahaira keska
 Senhor Deusū matu anu yunushanikiki,
 mā Israel hiwebaunabu anurā.
 Ha inū, Betel anua ha txi ketikainai
 tsuā nuka watiruma ishanikiki.
- 7 Maturā, mā peirashākāwā!
 Deusū yunuti kushipa pepa
 betsa wai mā hawē Deus sinatamamisbuki.
 Yusīti txanima kayabi betsa wakī
 mā txakabuwakubaīmisbuki,
 hawara hawē hiweti pepabiakē
 mai anu txaka ureā keska wakinā.
- 8-9 Bishi shukuabu hawē kena Sete-estrelu inū Órion dami wakī
 Senhor Deusū aniki.
 Hatunā, meshu betsa wakī shaba tashnimamiski.
 Hanushū ha shaba anua maewakī meshuri tashnimariamiski.
 Ianēwā anua hau hene inabainū kena
 ana inabaī niri ikī
 mai anu metxa wakubaīmiski.
 Mishki kenebaunibu kushipabiakē
 hatū hatu di amakī
 ha maewā merā hatū hiwe kushipa hatu yamawamamisrā,
 hawē kena Senhor Deuski.
- 10 Maturā, mā peirakāwā!
 Deusū yunuti kushipa pepawē matu nemabiaibū
 mā hatu danāmiski.
 Txanima hātxa yuimisbu hatuki txikishkī
 mā hatu ana nīkakatsis isbumariki.
- 11 Nuitapaibū shekiwā trigo tsekaibu
 mā hamē hatu biāmiski,
 mae shanē ibū yunuti txibākī
 hatu yumetsūkī
 hatu pema pema aka keska wakinā.
 Haskawē taea mishki hiwe hawērua
 mā hatu amabiaima anu

mã ha merã hiweama ikũkaĩshanaii.
 Uva bai pepa mã hatu banamabaiama
 hawẽ bimi tsekatã
 uva vinho wabiaimabu
 mã hanushũ hawa akama ikũkaĩshanaii.

12 Kanekubaĩkĩ matũ txakabu
 heneama mã akubainai ã unãhairaii.
 Pepabu bika tenemakĩ
 mã hatu danãkubaĩmisbuki.
 Hau hatũ txakabu kaka wayamanũbũ
 hune hatũ pei mã hatu biãmiski.
 Pepa inũ txakabu mã unãti wanikabu bebũshũ
 habu nuitapaibũ matu merabe yukabiabu
 mã hatu pewashũkatsi isbumaki,
 hawa hatu merabewamarã.

13 Mã txakabu wabiakubaĩmisbuwẽ taeshũ
 unanepabũ hawa matukiri yuikĩ
 pewashũtiruma pes shũ besti matu uĩtirubuki,
 matũ shinã txakabu haska washũ
 matu betsa wamatirubumarã.

14 Txakabu ana benama pepai hiwekũkainũ ika
 pepa besti benakubaĩkãwẽ.
 Mã haskakĩ txanima yuikubainaiburã:
 “Mekenika Deus kushipahaira
 dasibi binu keyua Senhor Deusũ nuku merabewamiski”, iwanã,
 mã shinãmisrã, txanima matu merabewashanikiki.

15 Danãkinã, txakabu besti akubaĩkãwẽ,
 pepa besti betxipaikinã.
 Ha inũ, habũ pepa inũ txakabu unãti wanikabũ
 hau ana matu itxakawama
 matu pe bestiwe manakushũkubainũbũ
 hatu uĩrakubaĩkãwẽ.
 Hamẽ mã haskaibu mã Israelĩ enabu nortekiria matu
 teshewabainimaburã,
 Mekenika Deus kushipahaira dasibi binu keyua Senhor Deus
 matuwẽ ana nuikĩ matu merabewatirumẽkaĩ.

16-17 Eska Mekenika Deus kushipahaira dasibi binu keyua Senhor Deusũ
 matu yuikiki:
 “Hanu kupinũ ika ã huai anu

hemaĩtĩ hanu itxa huĩrukũmisbu shaba tibi anua
 datei kashabaunaibũ
 mae bai tibi anua mapua kashai bis bis ibaunaibũ
 hatũ yunu bai anu dayaibu
 haburi itxatã kashaibũ
 peiwẽ taea hatu kashashuni bis bis imisbu
 haburi datei kasha txakayamaibũ
 uva bai anu dayaibu kashariashãkanikiki”, akĩ
 haska Senhor Deusũ ea yuishinaki.

- 18 Matũ Shanẽ Ibu Senhor Deus ha shabatiã hanu hushanai uĩkatsis iki
 mã mana txakayamabiairã,
 mã peirashãkãwã!
 Ha shabatiã hanu haskakirãshanairã, mã unaĩ?
 Ha haskaitianã, meshu keska txakabu besti ishanikiki,
 hawa shaba pepa hayamarã.
- 19 Huni betsã inu betsã leão betxibaini pashabiai
 unuria yuinaka pubẽ urso huaiki bepusia keska ishanikiki.
 Hanua betsã ikirã, hawẽ hiwe anu hikitã
 dunu hawẽ dõtuki tsamia haki tabiai
 pia keska ishanikiki.
 Haska dasibi mese betsã betsapa kaĩshanikiki.
- 20 Txanima hanu Senhor Deus hushanaitianã,
 hawa shaba hayama,
 meshu tẽ ikai keska besti ishanikiki,
 hawa pemarã.
- 21 Mã eskamisbu Senhor Deusũ matu ana yuikĩ:
 “Haska ea kẽwaĩ besikũkaĩkĩ
 mã txakabuwakubainairã,
 harã, ẽ danaiĩ.
 Itxai petã mã ea kẽwãbiakĩ
 hawẽ hiwekaĩkĩ mã ea benimawaismaki.
- 22 Yuinaka sheni inũ shekiwã trigo duru kuakĩ
 mã hawẽ ea duawakĩ kẽwãkatsis ibiaya
 ẽ ana ha betxipaiamakĩ.
 Ea ana daewanũ ishũ ina awa bake shuarãwã teseshũ
 hawẽ yura hirabi mã ea menu keyubiashuna
 hawẽ nue danãkĩ ẽ ana hakiri pe shinãma ishanaii.
- 23 Ha mã ea kẽwaĩ kãtai matũ hui kaiainã,
 ea nĩkamai ikama hamakiri besua ikãwẽ.
 Ha matũ mimawati harpa hui kaiainã,

ẽ nĩkakatsi ikamariki.

24 Matu anua ẽ yunuti pepa kaiã
 ẽ matu uĩkatsis ikaii,
 hene habai heneisma keskarã.
 Huni pepakĩ mã ana hatu parãbuma
 ẽ matu uĩkatsis iriaii,
 matũ pepa txatxa ũpash hawa netsuisma keskarã.

25 Israelĩ enabuũ, ea nĩkakãwẽ. Hanu tsua hiweabuma anu 40 ano hiwekubaũkinã, matũ shenipabunã, hatũ inãkuĩ tibi inũ hatũ inabũ sheni ea kuashũkĩ habũ ea kẽwãpaunibumẽ? Ea haska washunaibu ẽ uĩaama ikũkiraniki. 26 Hacia na eskatiã matubunã, habũ dami wani matũ shanẽ ibuhaira Moloquẽ dami inũ bishi Quium dami, yushibubu damirã, hawa heneama hune bekubiranibuki. Matubunã, habias keskari mã shinãkubainaiwẽ taeshũ 27 Damasco uke betsauri txaihaira anu ẽ matu hatu iyumakubaĩshanaii, ana haria txitũkirãtimawakinã”, akĩ Mekenika Deus kushipahaira dasibi binu keyuatũ ea yuishinaki, hawẽ kena Senhor Deusũnã.

Deusũ Israelbu nawabu hatu kupimashanikiaki, na hãtxarã

6 1 Sĩaõ anu hawa bika teneama mã hiwei pebiamisburã,
 mã peirashãkãwã!
 Samaria anu hawa dateama hatuki txiti ika mã hiwebiamisrã,
 mã peirashãkãwã!
 Matũ mae shanẽ ibu kushipabu yununikabũ
 Israelĩ enabũ mã hatu benamisburã,
 haburã, mã peirariashãkãwã!
 2 Assíria nawabu maewã Calné anu
 bushũ uĩtãkãwẽ.
 Hanua Síria nawabu maewã ewapa hatu binua
 Hamate anu bushũ hatu uĩriatãkãwẽ.
 Hanua butubaini bushũ Filisteu nawabũ maewã Gate anu bushũ
 uĩriatãkãwẽ.
 Ha nawabu betsa betsapabũ mae matuna keskamabiakẽ mã hatu
 hawa binuamaki.
 Hacia matũ mai pakearã,
 hatũ mai pakeatunã, matunarã, binuamaki.
 Ha mai pakea tibi hawa dasibi pemaki.
 3 Senhor Deusũ hanu matu kupiai
 shaba txakabu hubiashanaya haskakiri
 mã shinãkatsi ikamaki.
 Haskai hiwetimabiakẽ

- txakabu matũ shanẽ ibu keska wakĩ
 mã txakabu mese besti pa waii.
- 4 Hanushũ piti itxapa washũ pi
 elefante makushpi mabu wati benibuwẽ
 hawẽ dakati hawẽruahaira wanibu
 hanu bashti itã dakai petã
 txashuwã bake inũ ina awã bake shua nami
 matu shuishunabu beyuskĩ mã pikubaĩmiskiki.
- 5 Mimawati betsa betsapa
 Davĩ ani keska hatu amatã
 Davĩ mawani keska wama
 unãmabia unanumas teperewe mã mawa pewaismaki.
- 6 Kẽtxa ewapabuki uva vinho nushukubaĩkĩ
 mã sheni ininipahaira pepawẽ mã txa iake iakemisubia
 matũ mai pakea inũ matunabu txakabuwatirubu
 hatuwẽ nuiti mã hatukiri shinãkubaĩsmaki.
- 7 Besi watã pitĩ kayãwãshũ pi
 mã hãtxahairabiamis
 matu nesewabaĩkĩ matubu dukũ atxishũ
 nawa detenamenikabũ txaihaira anu matu iyushãkanikiki,
 haria mã ana txĩtũkirãtirumarã.

8 Nukũ Deus kushipahaira dasibi binua Senhor Jeová ibubis hãtxakĩ
 eska ea yuishinaki:

“Jacó enabu ibubis kẽkubainaibu danaĩ ẽ hatuki
 sinatahairakũkainaii.
 Hatũ hiwe ewapa hawẽrua betsa betsapa tibi betxipaiama
 hatũ maewã inũ hawara dasibi haya
 hatuki sinataibu yunukĩ
 dasibi hatu inãkĩ hatu atximatã
 ẽ hatu ibu wamashanaii”,
 ikĩ hawẽ hãtxa mestẽwãshinaki.

9-11 Hiwe ewapa hawẽrua dasibi inũ hiwe ewapabuma dasibi
 hawenabuyabi hau hatu kupinũbũ Senhor Deusũ hatu yunushanikiki.
 Dasibi txakabuwakĩ keyushanaibuwẽ taea hiwe bestitxai anu 10 huni hatu
 teshe washinabu dasibi mawariashãkanikiki. Date paepaibũ hawenabu
 hiwe betsa anua mawa hawẽ yura binũ ishũ hawenabu betsã hatũ hatu
 biai yuka ikĩ: “Huni betsa hiwea uke merã mibe hayamẽ?” aka kemakĩ
 yuikĩ: “Nenu tsua ebe hayamaki”, aka hatũ yuikĩ: “Senhor Deusũ nuku
 kupiaya hawẽ kena hawa datã akĩ hawa yuiyamawe”, akĩ yuishanikiki.

12-13 Matubunã, hawa shabakabi unãma benimakĩ yuikĩ:

“Nukũ kushipawẽ hatu binukĩ maematã
ikis nũ yunuti kushipa hayaki”,
mã ibiamis ha hãtxa pepa yuibiakĩ
betsa wakĩ tenãti dau keska mã wakubainaii.
Ana betsa wakĩ maewakinã, ha yunuti pepa mã hawẽ sinatati
txakabu wakubainaii.

Kushikaini mishki mati matipa anu cavalo kai
hawama ishtxuakeakekaĩtirumẽ?

Itirubumahiraki.

Hanua ianẽwã ukebukũ tsispukĩ
pashkabaikĩ tsuã atirumẽ?

Atirumahairaki.

Haska keskariai Deusũ kupiti mã betsa watirumaki.

14 Israeli enabuũ, eskaki. Shinãkĩ peirawakãwẽ.

Mekenika Senhor Deus kushipahaira dasibi binu keyuatũ matu
yuikĩ:

“Matu itxakawanũ, iwanã,
nawa kushipahairabu matu anu
eã ã hatu iweshanaii.

Hamate Norte txaihairakiria bekubirãkĩ
sul txaihairakiria anuari beriakĩ
matu atxitã dasibi itxakawakĩ
harakiri matu nitima washãkanikiki”,
akĩ txanima hãtxa Senhor Deusũ ea yuishinaki.

**Shinĩ txakabuwashanaibu nama keskawẽ Senhor
Deusũ Amós uĩmanikiaki, na hãtxarã**

7 ¹Eska Senhor Jeová ea uĩmashinaki. Matu yuinũ ea nĩkakãwẽ.
Shanẽ ibuhairatũ inabũ basi pishanaibu hatu urushũbiashina ha basi
ana beneaitiã Senhor Deusũ shini mirimahaira dami wai ã uiãyã ²shini
beshũ basi pikubaikĩ hawẽ henekĩ piaibũ eã yuikĩ:

—Senhor Jeovaã, nukũ txakabu nuku buashũwẽ! Jacó enabu nũ
itxapamawẽ taeshũ hatitũ nũ tenetirubumaki, debui keyukinã— ã wa
³hanushũ ea kemakĩ yuikĩ:

—Haska shinãkĩ mĩ ea yuiairã, ã ana haska kaĩmama ishanaii— akĩ
hawẽ kupiti Senhor Deusũ heneshinaki.

**Txĩ txakabuwashanai nama keskawẽ Senhor
Jeová Amós uĩmanikiaki, na hãtxarã**

⁴Eskari Senhor Jeová ea uĩmashinaki. Matu ana yuinũ ea nĩkakãwẽ.
Kupikĩ txi here kuhairai Senhor Jeová yunua bekĩ mai uke meranua hene

netsukĩ tsusĩwākĩ tashka wakĩ keyushũ yunu bai anua dikabi tsusĩwākĩ keyukubainaya uĩkĩ ⁵ eã yuikĩ:

—Senhor Jeovaã, nukuwẽ nuikĩ menaã, neri iweama habiari niti awe! Jacó enabu nũ itxapamawẽ taeshũ ha txi nũ betsistirubumaki, debui keyukinã— ã wa

⁶hanushũ ea ana kemakĩ yuikĩ:

—Haska shinãkĩ mĩ ea yuairã, ha dikabi ã ana haska kaĩmama ishanai— akĩ hawẽ kupiti Senhor Jeová heneshinaki.

**Dispiki prumo dunuawẽ hawẽ yushtu unãti nama keskawẽ
Senhor Deusũ Amós uĩmanikiaki, na hãtxarã**

⁷Eskari Senhor Deusũ ea uĩmashinaki. Matu ana yuinũ ea nĩkakãwẽ. Maewã mishki kenebaunibu dapi Senhor Deus nia dispiki prumo dunuawẽ mishki kenebaunikatũ hawẽ daya yushtuma pemẽkaĩ, iwanã, unãti hawẽ mekwẽ tsumashũ dũtãshũ ⁸ Senhor Deusũ ea yukakĩ:

—Amósĩ, ã mekẽ anua hawa mĩ uiaĩ?— ea wa eã kemakĩ yuikĩ:

—Hawẽ nitxĩ yushtumawati unãti mĩ hayaki— ã wa hanushũ ea yuikĩ:

—Na nitxĩ pemẽkaĩ, iwanã, unãtiwẽ enabu Israelburã, haska hatũ shinã pewẽ hiwekubaĩkanimẽkaĩ, iwanã, ã hatu unãti wakubaĩshanaii. Hatũ txakabu tere akĩ ã ana hatu buashunama ishanaii. ⁹ Hanushũ Isaque enabũ ha tari hiwe merãshũ ea kẽwãpaunibu yamawakĩ hatu keyumatã hanushũ Israelĩ enabu nortekiri hiweabũ hatũ mekenika yushibubu kẽwãti hiwe betsa betsapa hatu txakabuwamakĩ keyumatã heneshãkanikiki. Haska wakĩ Jeroboãonẽ enabuki sinatakĩ nupe txaipawẽ hatu deteshãkanikiki— inikiaki.

Amaziasĩ Amós yunukĩ ha anikiaki, na hãtxarã

¹⁰⁻¹¹ Betel anushũ Amazias hawenabu Deusbe hãtxashunikatũ Samaria anu Israelĩ enabu shanẽ ibuhaira Jeroboão anu hãtxa bumakĩ yuikĩ: “Israelĩ enabu hiwebaunabu namakis anu Amós nikaũkĩ mikiri txanikĩ mia deteshanaibu yuikubaũkĩ hatu yuikĩ: ‘Nupe txaipa kenuhairawẽ matũ shanẽ ibuhaira Jeroboão detetã mã Israelĩ enabu dasibi txaihaira anu matu iyushãkanikiki, ana haska txitũbirãtirubumarã’, akĩ yuikubaunai has hãtxa yuiai nĩkakĩ ana tenetirubumakiaki”, ashũ hãtxa bunika yunua hawẽ hãtxa bushũ

¹² hanushũ hawaira Amós kena hua ha bebũ nia Amaziasĩ Amós yuikĩ:

—Deusũ hãtxa yuishunikaã, nenua nuku henebaini Judã enabu anu menã kariwe. Deusũ hãtxa yuishũkubaini hari hiwea dayakĩ mĩ hamapai bikubaĩritãwẽ. ¹³ Ha inũ, na kẽwãti hiwe anu nukunabu dasibi bebirã bebirãmisbuwẽ taea hanua ana haska ishanai hatu yui hãtxayamawe.

Hakia nenu nukū shanē ibuhairatū mae Betel anushū nuku yunuai anurā, tari hawē kēwāti hiwe meribi nū hayaki— aka

¹⁴hakia Amósī kemakī yuikī:

—Earā, ē Deusū hātxa yuishunikamaki. Ha inū, ibubis ē haska yuitirumariki. Hakia earā, ē Deusū hātxa yuishunikatū bakemariki. Hamē ha dayakī ē hamapai ē bimirā, txashuwā mekekubaikī inū figo ni meranua hawē bimi tsekakubaini ē hawē hiwekūkainimaki. ¹⁵Hakia habiatīāri txashuwā ē mekebiakē Senhor Deusū ea henematā ea yuikī: “Enabu Israelbu norte anu hiweabu anu kashū ē kushipawē ē hātxa ea hatu yuishūkubaītawē”, iwanā, ea nitxīmaki. ¹⁶Haskawē taeshū Senhor Deusū hātxa mia yuinū nīkawē. Miā ea yuikī: “Israelī enabukiri txakabu yuikī Deus hātshūyamawe. Ha dikabi Isaque enabukiri hatu yuāyamawe”, mī ea wabia ¹⁷eska Senhor Deusū mia yuikī: “Mī aī maewā anua shabakabi hininipai txutanamekūkaīshanikiki. Mī huni bakebu inū mī aību bakebu nupe txaipa kenupawē detekī hatu tenāshākanikiki. Mī bai inū mī inabu inū minabu betsa betsapa dasibi shau sēke númeroya urēkī hawē unātā hatu pashkakī bishākanikiki. Miarā, txaihaira anu mia iyuabu hanushū Senhor Deus ikūwābuma anua mī mawashanai. Minabu Israelī enabu atxishū txaihaira anu hatu iyushākanikiki, ana haska txītūbirātirubumarā”, akī haska shabakabi yuitā kaīkainikiaki.

**Israelī enabu hatū txakabuwē ma bimi
hushīhaira keskanibukiaki, na hātstarā**

8 ¹Hanushū Mekenika Senhor Jeová ana betsa ea uīmachina matu yuinū ea nīkakāwē. Kukiki bimi hushīhaira mata tsaua ē uiāyā

²Senhor Deusū ea yukakī:

—Amósī, mī hawa uiaī?— ea wa

eā kemakī yuikī:

—Kukiki bimi hushīhaira mata tsaua ē uiaī— ē wa

Senhor Deusū ea yuikī:

—Israelī enabu hatū txakabuwenā, ma bimi hushīhaira keskabuki.

Hatū txakabu tere akī ē ana besti wakī hatu buashūkatsi ikamahairaki.

³Ha shabatiā Deus kēwāti hiwe hemaītī anua kēwaī kātabiai betsatani bis bis ibaunaibu ha yurabu mirima hatu tenā keyuabu tsuāra hune hatū yura sharabaībaikī hatu urēshākanikiki— ea akī Senhor Jeová hawē hātxa mestēwāshinaki.

Israelī enabu hanu hatu kupishanai ma kemaikiaki, na hātstarā

⁴Hawa hayabuma nuitapabiaibū matū mai anushū ana hatu itxakawakī mā hatu txakabuwamisbuū, ea nīkakāwē. ⁵Matubunā, eska yui mā hātshamiskī: “Ushe bena hanu besiti binukainaya nukū shekiwā trigo hatu inākī pei itxapa bikatsi ikī nū hatu inākubaītiruki. Hanua huīrukūti shaba

binukainaya hawē tanati pishta inū hawē shākama unāti txakabuwē hawē karu shekatā nū hatu inākubaītiruki. ⁶Nuitapaibū nuku diriabu hawē taeshū pei bikatsi dayaru escravo hau hatu wanūbū hatu inākī nuku diriabu nū hatu inā hawē nuku pakatirubuki, bitxi tae besti nuku diribiakenā. Ha dikabi shekiwā trigo deshka txakabubiakē hari nū hatu ināriashanai, pei bikinā”, ikī mā shinā txakakubaīmisbuki. ⁷“Haska mā txakabuwakubaīmisbu ē hawa hakima taskama ishanai, ea ē Jacó Deus ibubis matukiri ē yubakaii”, iki matukiri Senhor Deus hātẓaimaki.

- ⁸ Bari tibi Egito anu ha henewā ewapa Nilo bai matatā netsutātāmis keskai
mai patxa sakui mai namanua inatā
hanua ana māi butuaya
dasibi hiwebaunabu kasha txakayamashākanikiki,
datehairairā.
- ⁹ Senhor Deusū hawē hātẓa mestēwākī yuikī:
“Ha shabatiā bari mananābi txashabia
bari ibubis nukai
mai hirabi meshū atxi keyushanikiki.
- ¹⁰ Mā besiaibutiā hanu ē matu tenāyā
mā bis bis ishanai inū
mā kātai matu betsa wakī
mawa beabu mā kasha txakayamashanaii.
Minabu mawabuwē nui
hawē punu nuka hawē unāmati besha tari sawea
nui tenehairai mashtekei mā mawerē ishākanaii.
Matū huni bake bestitẓai mawakē
ana hania bitima nui kasha txakayamai keskai
dasibi huīti nishmai keyushākanikiki.
- ¹¹ Mai hirabi anu buni pae
ē yunushanai ma kemaikiki”, iwanā,
hawē hātẓa ana mestēwākī yuikī:
“Ha shaba haskaitianā, piti kayabiwē buniamā
ūpash kayabi manuama
hakia ē hātẓa nīkakatsis ishākanikiki.
- ¹² Ē hātẓa benai yurabu harakiri kai
unābuma berutubauni
ianēwā itamamahairakiri bui inū,
henewā kesha betsauri bui inū,
nortekiri bui inū, bari huaikiri bubia
hakia hania ē hātẓaxaki nukutirubumahaira ishākanikiki.
- ¹³ Habiatiāri txipash hawēruabu inū berunā kushipabu

ũpash manuhairai unãyamasi shinaneshãkanikiki.

- 14 Samaria anua yushibubu dami
tsuabũra mã yubamisbuki.
Hanua tsuabura yubakai hãtxairã,
Dã anu hiweabu matũ yushibũ hiweawẽ mã yubakamisbuki.
Hanua Berseba anu yushibubu hiweabuwẽ
mã yubakakubaĩmisbu mawai mã di ishanaii,
ana haskatã mã benitirubumarã”,
akĩ txanima hãtxa Senhor Deusũ ea yuishinaki.

Senhor Deusũ hatu kupiaya tsua pashama ishãkanikiaki, na hãtxarã

- 9 ¹Jerusalém anu hawẽ kēwãti Templo hemaĩti anu txi tapu dapi
Senhor Deus nia ã uiaĩã ea yuikĩ:

“Ha txibu masua tibiki mane bronze maiti hawẽrua haya
hau teskekirã niri ikĩ yurabu hau hatu txusha txusha akubainũ
ha bronze dera dera akĩ pure pure akubaĩkĩ
heneyamashãwẽ.

Tsuara habu ha tekekirã hatu tenãmarã,
haburã, nupe txaipawẽ ã hatu tenãmashanaii.
Pashabiai haskatã bestitxai hamesti piskukaini iruama ishanikiki.

- 2 Mai kini uke merãhaira hunebiai kakẽ
habiarã ã hatu tashnimashanaii.
Nai keyatapahaira anu hari mapekebiabainabũ
habiarã ã hatu buteshanaii.

- 3 Mati Carmelo mamakihaira tsuara hari hunebiai kakẽ
habiarã hatu benai ã kashanaii.
Eki datei ianẽwã nuahaira anu hunebiai kakẽ
eã hatu yunukinã, kushu ikã
hau hatu detenũ ã yunushanaii.

- 4 Hau ana txitũyamanũbũ
hatuki sinatamisbũ txaihaira anu hatu iyushũ
nupe txaiapa kenuhairawẽ
hau hatu detenũbũ
ã hatu yunushanaii,
hatuwẽ nuiama hatu itxakawakĩ
ea bebũshũ tenãkinã”, ea washinaki.

- 5 Mekenika Deus kushipahaira dasibi binua Senhor Deusũ
mai mea mai payukui babuaya
ano tibi Egito anu hawẽ henuwã ewapa Nilo bai matai ewatã
netsutãtãmis keskai

mai manaūri inakaina ana shekei butuaya
hanua dasibi yurabu hiwebaunabu
datehairai kashakubaīshākanikiki.

- 6 Senhor Deusū hawē hiwe wakinā,
nai anu ma aniki.
Ha nai nāketapa mai bepumaniki.
Hanushū ianēwā itamamahaira anua hene
hau benūbū hatu yunua
beshū mai anu ui imakī
mai metxawakubaīmisrā,
hawē kena Senhor Deuski.

- 7 Eska txanima hātxa Senhor Deusū matu yuikī:
“Israelī enabuū, ē matukiri shinanā,
matu inū Etiópia nawabu
mā habiaskaski, matū hiwea pamarā.
Egito anua matū shenipabu ē iweni keska wakī
Caftor anua Filisteu nawabu hatu iwetā
Quir anua Síría nawabu ē hatu iwerianiki”, itā

- 8 txakabuwē shanē ibukī
yunukubainaibu anu hawenabu txakabubu hatu uīkī
Senhor Jeová hatukiri yuikī:
“Na mai anu hiweabu ē hatu tere akī yamawashanaii.
Hatu haska wabiakī Jacó enabu dasibi
ē yamawakī keyuama ishanaii,
haskaira hatu keyuamarā.
Ea Senhor Deusū ē hātxa ē mestēwaiī.

- 9 Txakabu inū pepa tsistakī
shekiwā trigo tamisbu keska wakī
Israelī enabu hau tsistakī akawanūbū
ē hatu yunushanaii,
hawa betsa pepa kauani hau benuyamashanūbunā.

- 10 Enabu txakabububia dasibi hātxa txakabui:
‘Hawara txakabu mese hukī ea meama ishanikiki’, ikī yui
hātxakubaīmisburā,
nupe txaipawē hatu tenāshākanikiki”, itā

**Hatū mai pakea anu Deusū hawenabu ana txītūwātā
pepawē hatu hiwemanūbarikiaki, na hātcharā**

- 11-12 Senhor Deusū ana yuikī: “Davī enabū mae nawabū hatu babu
watā di akī txakabuwanibu ana habianuri mishki di anibu benikī hatū

mae ē hatu kushipa washanai ma kemaikiki. Uatiã hiwenibu keska ana hiweshãkanikiki. EDOM enabu hatiri tesheabu inũ yura shukuabu tibiki ē kena ē netani Israelĩ enabube hau ana dasinũbũ ē hatu kushipa washanaii”, itã hawẽ hãtxa Senhor Deusũ habias yuiã keska akĩ meneshanai yuinikiaki.

¹³ ESKA Senhor Deusũ ana yuikĩ: “Shekiwã trigo txushihaira mirimahairawẽ taea tsekakĩ keyuriabuma ana hanu banatitiã kemaya mai yapubainaibutiã huni betsabu beshãkanikiki. Hawẽ hene tsinikĩ uva bimi mirimahairaki pai pai ikĩ keyuriabuma shekiwã trigo ana banatitiã ikũkaishanikiki. Mati keyatapa inũ mati tenãmã anua ũpash itxapa habai keska uva vinho itxapa hayashãkanikiki. ¹⁴ ENABU Israelbu txaihaira anu iyunibu hawenabu ē hatu txĩtũwãshanaii, haria ana hatu iwekinã. Beshũ hatũ maewã txakabuwanibu ana hawẽ shãtukũ ana benikĩ pewakĩ keyutã hanu hiwewabaũkĩ uva bai banaima bimaia vinho washũ akubaĩkĩ yunu bai banaimabu hatũ yunu bimi tibi pikubaishãkanikiki. ¹⁵ Hatũ mai kayabi ē hatu inãni anu ē ana hanu hatu txĩtũwaĩma anua dayakĩ mibãkubainaibu hanushũ tsuã ana hatu iyu taskama ikubaishãkanikiki”, atã Mekenika Senhor Deusũ hawẽ hãtxa mestẽwanikiaki.